

Ricordo in vernacolo di Ambrös: «Vita colonial»

Madòi come l'è bèl
desdàs a la matina
dopo d'ì ben dormìt
maciàt in dè brandina!
Desdàs in colonia, a Bratt,
tra ciel, montagna e prat!

Madòi come l'è bèl
stà ché òna settimana!
Chissà stà ché a de piö...
ma 'l suna la campana
«Sveglia!!!». Coragio, alà
'n va mia a laurà.

La suna, la me 'nvida
a god de la natüra
«Fò de sto balì
e 'nde a l'aria püra;
ché l'aria dè montagna
la löstra zo la gagna!»

Cosa me 'mporta a noter
de püdi mia parlà;
ànse; l'è a piö mei,
per püdi mei scoltà
d'ì mucc la poesia
ché 'nfina al cör la rìa.

Ol sul l'è zà lèat
in tóta la sò fèsta,
e 'nvèd la Presolana
con indorat la grèsta;
e Bratt, Dorga e Castiù
i è lè ch'ì par bumbù!

L'aria l'è nèta e frèsca
i gh'è dà a cipa i ozèi,
i pascùla, mögiando, i ache
ciocando i sò bronzèi
i canta i gai, e i cà
i respond col sò baià

Ol sul, a poch a poch,
al toca zò 'n de val
dando d'ì spènelade
söl quader natüral.
come nissü penel
al la pöl fa zò isse bel!

Per ringrassia 'l Signur
sentèm per prim la Messa;
dopo per colassiù,
quach meche 'n del lacc in fressa,
e via a sgulandrà
sö i mucc, dè ché e dè là.

I prime spassesade
l'è ü gir de ispesiù
per vèd come i sè troa
i noste posissiù
e, caso mai, per aproà
quach bèle novità!

Pian pianì isse 'n rìa
a la pineta granda
opör al «fontanì»
da l'acqua memoranda,
co' l'anima zà piena
dè sta visiù serena!

Respirando i nosc pulmù
chè l'aria imbalsamada
la èta nostra grama
m'la zà dösmentegada
e n' sè turnacc contècc
come 'n gh'èss mia d'impècc!

Facc vegn cosè l'urare
che volge ...dè sbafà
dopo chè 's'è dierticc
zögando a tött andà
a 'n turna a refà i stradele
con d'òna fam dè chele

Saràla pò l'arieta
che tira 'n sö de che,
saràl pò 'l möiment
che a noter me fa be,
l'è 'l fat che l'apetito
sto ludro, al fà mai sito...

I noste brae còghe
l'apetito po' i contenta
e i basie de minestra
e rotoi de polenta
che söbet i sparèss
con 'nsèma ol ... sè capès.

Dopo d'ì ben mangiat
con sura quach quartì
bisogna fa ü chilo
e m'ì schissa ü pisoli,
cosè 'n s'è piö de lena
per fà egn l'ura dè sèna.

La qual la rìa piö prest
col fà amò du pass,
òna quach partida a i carte
e zöch per isvagas
e, lassèm pör ch'ì 'ndaghe,
al fünziuna ol «strassabraghe»...

E quando 'l vè sà rira
che 'l sè scüres òl ciel
e i lènc rintoch de l'«Ave»
al gh'è dà a tirà 'l Daniel,
i s'è impia come fiamèle
a òna a òna i stèle.

Fènit l'è issè ü bel de
e senza sacrefesse
ch'ì chè s'è rincorzit
che m'era facc giödesse?
Ma mè 'l fò töcc i dè
sè 'l costa issè poch, ol bè!

Come ü gran sènare
al sè lassa zò alura
che tött a l'ì scond via
chè a tött al passa sura;
ma 'n del nòst cör la rèsta
amò töta òna festa!

Che quando la lüna bèla
la comincia po a lè a smicià,
e i furme i s'è profila
de Lantana e Scanapa...
l'öltima cantada
la s' perd per la valada...

Quando la Presolana
co i sò magie la 'ncanta
ch'ì éi che gh'è resiste,
ch'ì éi che andà sò amò i stanta?
Ch'ì éi ch'ì disgrassiacc
che gnamò mia i gh'è stacc?

Ghè amò d'ì stele 'n ciel,
l'ì stà per nas ol dè,
quando ü grupo alègher
Bratto al lassa 'n drè;
l'era 'l sogn de la setimana:
'nda sò in Presolana.

Ai pe de sta müraia
che tat am'ia sognat,
quase 'n sè sent pèrdicc,
chè degn a 'n sè mia dè tat
e ü strano sentiment
al m'è ciapa in chel moment...

Òna òia, òna grand'òia
dè 'nda semper piö sò,
chè ogni pas che 'n fa
legèr a 'n sè sent de piö;
che ogne pass che 'n fa,
semper piö be m'ì sta!

Facc ol canali
con cèrta emussiù
facc pò a la paretina

quase con diussü
adoma quach pass m'è resta
ed eco sò la gresta!

L'é de la Presolana
che tött al dipend lè sòta
e òna semplice ögiada
la costa mia negòta
per fà ü bel viasèt
dal Gleno fina al Cornètt.

Ol Gleno, co la sò diga
urmai isconquassada,
che pör amò 'm la esta
co l'acqua impresùnada!
Coler, Dez, Vilminur...
ricordi dè dé migliur!

Col fond del Pizz Camì
zo zo, la via Mala;
per chèl che gh'è capitat
no 's pòdia che isse ciamala,
chè, vitima del Gleno,
a i acque la metit freno.

Eco la Cantoniera:
l'è ü sito de gran quiete!
Elegante co i sò vile
tra pracc e tra pinete;
oh, quance bei de
che m'à passat sò le...

E söl Scanapà, Lantana?...
e anche là söl Pora
doe la polenta e lacc
la m'à facc fà dè ...l'ora!
O mucc, grassiusa meta
de spensierada eta!

L'öcc ura girem
dè che dè la valada
traersando la pineta
da l'ombra profòmada.
Eco Dorga, doe dè drè gh'è
ol strassabraghe, la fonte di Mosè.

Castiù! La capital
de sto tòch de paradis;
con lü 'n g'à confidenza.
po a lü l'è nost amis...
chè quando a Castiù 'n ria
tocc i è sò la via.

De Val d'ì Möli - S. Piero
a 'n conta töcc i pass;
col torent da l'acqua ciara
doe sèmper a 'n va a bagnas:
e che spiaggia... ma che rabbia
con ch'ì sachèi de sabbia!...

A egn in sà ü tochel
gh'è la fonte, eco 'l Cornètt!
Gite oziuse e vagabonde
per stimolà 'l baghett,
e, indando a spass per scüsa
'n sè ferma lè a la busa.

In fond in fond, gh'è i Bares
po alure 'n del programa:
i è però 'n po fadiguse
ma i dà, scambe, ol panorama.
Piö in là s'va mia inacc,
i è i confi delimitacc.

Dem zo ades per i Corzene
a sircà d'ì stele alpine,
che con ansia i ve strepade
(promesse berechine!)
e l'è forse l'ünech fiur
che l'è degn d'ì nosc südur.

Turnando a la Colonia
a l'ombra del sò tecc,
gh'è òna gioia, òna gran festa
de zuegn e de scècc,
contecc de èss turnàcc
per fà deenta màacc!

**Poesia scritta in occasione
del X anniversario di apertura
della Casa alpina**